



Prop. 24 S

(2010–2011)

Proposisjon til Stortinget (forslag til stortingsvedtak)

Endringar i statsbudsjettet for 2010 under Nærings- og handelsdepartementet

*Tilråding frå Nærings- og handelsdepartementet av 26. november 2010,
godkjend i statsråd same dagen.
(Regjeringa Stoltenberg II)*

1 Innleiing

I denne proposisjonen legg Nærings- og handelsdepartementet fram endringsforslag på statsbudsjettet 2010 i samsvar med pkt. 2 nedanfor.

2 Endringsforslag

Kap. 900 Nærings- og handelsdepartementet

Post 01 Driftsutgifter

Ved kongeleg resolusjon 25. juni 2010 blei ansvaret for forvaltninga av Norsk Eigedomsinformasjon (NE) overført frå Justisdepartementet (JD) til Nærings- og handelsdepartementet (NHD) med verknad frå 1. juli 2010. Overføringa av ansvaret for forvaltning av staten sine eigarinteresser i NE frå JD til NHD har ført til auka arbeidsbelastning og ressursbruk for NHD i andre halvår 2010. For å kompensere for dette foreslås det å overføre 75 000 kroner frå JD (kap. 400, post 01) til NHD.

På dette grunnlaget gjer Nærings- og handelsdepartementet framlegg om å auke løyvinga med kr 75 000, frå kr 174 467 000 til kr 174 542 000.

Ein viser til omtale i endringsproposisjon frå Justisdepartementet.

Kap. 909 Tiltak for sysselsetting av sjøfolk

Post 73 Tilskot til sysselsetting av sjøfolk, overslagsløyving

Ordninga omfattar:

- tilskot til refusjon for farty i Norsk Ordinært Skipsregister (NOR) og Norsk Internasjonalt Skipsregister (NIS) (9,3 eller 12 pst.)
- nettolønstilskot til bemanninga omfatta av alarminstruksen på passasjerferjer i utanriksfart i NOR
- nettolønstilskot til farty i petroleumsverksemd (dvs. offshorefarty) i NOR og andre farty i NOR (lasteskip, brønnbåtar, passasjerskip og slepebåtar)
- nettolønstilskot til tryggleiksbemanninga på hurtigruteskipa som betener strekninga Bergen – Kirkenes

Ordinær løyving i saldert budsjett 2010 var 1 750 mill. kroner. På grunnlag av utrekningar og prognose etter utbetalingane for dei tre første terminane i 2010 vart løyvinga redusert med 50 mill. kroner, til 1 700 mill. kroner, i samband med Revidert Nasjonalbudsjett 2010, jf. Prop. 125 S og Innst. 350 S (2009-2010).

Hittil i år er det utbetalt nærare 1 000 mill. kroner for fire terminar: 6.termin 2009 for november-desember medrekna etterslep og etterbetalingar

frå 2009 og 1.-3. termin 2010 (januar – juni). Medrekna forventa tilskotsutbetalingar for dei restrande terminane i 2010 (for juli-oktober) er det grunnlag for å justere ned anslaget for dei samla utbetalingane i 2010 til 1 550 mill. kroner.

Tilskotsordninga er regelstyrt og særleg talet på sjøfolk, som er omfatta av ordningane, er avgjerande for storleiken på refusjonsutbetalingane. Vidare er lønsnivået for dei aktuelle sjøfolka utslagsgivande. Reduksjonen i tilskotsutbetalingane i høve til anslaget i Revidert Nasjonalbudsjett 2010 skuldast fleire faktorar. Mest utslagsgivande er at færre sjøfolk enn venta har vore omfatta av nettolønsordningane, mindre lønstillegg, og at fleire skip har ligge i opplag eller på anna måte har vore uverksame i perioden.

På dette grunnlaget gjer Nærings- og handelsdepartementet framlegg om å redusere løyvinga med 150 mill. kroner, frå 1 700 til 1 550 mill. kroner.

Kap. 922 Romverksemd

Post 70 Kontingent i European Space Agency (ESA)

Kontingenten i den europeiske romorganisasjonen ESA utbetalast i euro. Norsk Romsenter har hatt utbetalingar i euro til ESA til andre kursar enn den som vart lagt til grunn for saldert budsjett. Samstundes har det og vore justering i kontingentoppkallinga frå ESA i budsjettåret. Som følge av dette blei løyvinga redusert med 15,2 mill. kroner ved Stortinget si handsaming av Prop. 125 S og Innst. 350 S (2009-2010). Etter ny justering gjer ein no framlegg om at løyvinga blir redusert med ytterlegare 7,9 mill. kroner.

På dette grunnlaget gjer Nærings- og handelsdepartementet framlegg om å redusere løyvinga med 7,9 mill. kroner, frå 130,2 til 122,3 mill. kroner.

Post 71 Internasjonal romverksemd

Deltaking i internasjonal romverksemd utbetalast i euro og amerikanske dollar. Valutakursane har endra seg i budsjettåret i høve til kursane som blei lagt til grunn for saldert budsjett. Samstundes har det vore ei endring i oppkallinga av programmidlar frå ESA i 2010, på grunn av endra framdrift i gjennomføringa av programma.

På dette grunnlaget gjer Nærings- og handelsdepartementet framlegg om å redusere løyvinga med 22 mill. kroner, frå 404,2 til 382,2 mill. kroner.

Post 73 Galileo

Kontingenten for norsk deltaking i det europeiske satellitnavigasjonsprogrammet Galileo utbetalast i euro. Valutakursen har endra seg i løpet av budsjettåret samanlikna med kursen som vart lagt til grunn i saldert budsjett. Samstundes har det vore endringar i oppkallinga av kontingent frå Europakommisjonen. Valutakursendringar, tidsforskyvingar og endra oppkalling har ført til at utbetalingane til Galileo har auka med 6,5 mill. kroner.

På dette grunnlaget gjer Nærings- og handelsdepartementet framlegg om å auke løyvinga med 6,5 mill. kroner, frå 119,9 til 126,4 mill. kroner.

Kap 924 Internasjonalt samarbeid og utviklingsprogram

Post 70 Tilskot, kan overførast

Løyvinga dekkjer kontingent til Europakommisjonen for norsk deltaking i EU-program som Nærings- og handelsdepartementet har fagansvar for. I tillegg dekkjer løyvinga utgifter knytt til oppfølging av programma, m.a. nasjonale ekspertar, nasjonale sekretariat og kontaktpunkt, utgreiingar og evalueringar.

Løyvinga på 56 mill. kroner i saldert budsjett blei fastsett på grunnlag av budsjettanslag frå Europakommisjonen og forventa eurokurs i statsbudsjettet for 2010. Basert på endeleg budsjett frå Europakommisjonen frå juli 2010, faktisk innbetalt kontingent for dei aktuelle programma til endra eurokurs og prognose for følgjeutgifter resten av året kan løyvinga reduserast med 12 mill. kroner.

På dette grunnlaget gjer Nærings- og handelsdepartementet framlegg om å redusere løyvinga med 12 mill. kroner, frå 56 til 44 mill. kroner.

Kap. 950 Forvaltning av statleg eigarskap

Post 21 Spesielle driftsutgifter

På statsbudsjettet for 2010 er det løyvd 10,7 mill. kroner til å dekkje utgifter og fagleg bistand i samband med aksjetransaksjonar i selskap under Nærings- og handelsdepartementet si forvaltning. Posten skal og dekkje konsulentbistand ved eigar- og strukturmessige vurderingar og VPS-avgifter. Det er overført vel 1,6 mill. kroner frå 2009, og det er vidare knytt ei overskridingsfullmakt til posten.

Dei samla utgiftene for 2010 vil venteleg bli om lag 26,5 mill. kroner. Når ein tek omsyn til 1,6 mill. kroner som er overført frå 2009, er det behov for ei løyving på om lag 24,9 mill. kroner for 2010.

På dette grunnlaget gjer Nærings- og handelsdepartementet framlegg om å auke løyvinga med 14,2 mill. kroner, frå 10,7 til 24,9 mill. kroner.

Post 95 (ny) Kapitalinnskot

Statkraft – Strategiske og finansielle rammer

Bakgrunn

I eit brev til Nærings- og handelsdepartementet i februar 2009 bad styret i Statkraft om ei styrking av kapitalen til selskapet i form av eit kapitalinnskot på 8 mrd. kroner og ei justering av utbyttepolitikken overfor selskapet med ein utbytteandel lågare enn 75 pst. Til saman skulle dette leggje til rette for eit investeringsprogram på om lag 90 mrd. kroner. Bakgrunnen for oppmodinga var eit ønskje om å realisere styret sitt forslag til investeringsstrategi for selskapet i perioden 2009-2015. Dette er spørsmål som departementet og regjeringa har vurdert grundig i 2009 og 2010.

Ny konsernsjef byrja i Statkraft 1. mai 2010. Ny konsernleiing blei etablert i juni same år. Samstundes vart det på føretaksmøtet i juni valt ny styreleiar og enkelte nye styremedlemmar.

Statkraft fatta i juni 2010 vedtak om ein strategi fram mot 2015 som er meir fokusert samanlikna med strategien som blei lagt fram i februar 2009. Strategien medfører at Statkraft framover i større grad vil ha fokus på kjerneverksemda knytt til fleksibel kraftproduksjon og vindkraft i Nordvest-Europa. I tillegg vil selskapet investere i vasskraft i Sørøst-Europa og i enkelte land med raskt veksende økonomiar i Sør-Amerika og Asia.

Som følgje av endringa i investeringsstrategien sende Nærings- og handelsdepartementet i august 2010 eit brev til det nye styret der selskapet vart oppmoda om å gjere ein ny gjennomgang av kapitalbehovet.

Etter ein nærare dialog fekk departementet svar frå styret i Statkraft i november 2010. I brevet viser styret til at det er eit betydeleg potensial for verdiskaping i Statkraft innanfor hovudretninga som ligg til grunn for strategien frå juni 2010. For å ha finansiell kapasitet til å kunne realisere dette potensialet ber styret om eit eigenkapitalinnskot på 14 mrd. kroner. Selskapet har då lagt til grunn eit utbyte på om lag 80 pst. Dette inneber eit investeringsprogram på om lag 82 mrd. kroner. Justert for metodeendringar i modelleringa er dette ein reell nedgang på over 20 pst., målt mot investeringsplanen frå februar 2009.

Om oppmodinga frå styret

I brevet til departementet peiker Statkraft på at tettare samankopling av kraftmarknadane i Europa, ambisiøse mål for fornybar energi i Europa, auka behov for fleksibel energiproduksjon på kontinentet og den sterke veksten i fleire økonomiar utanfor Europa, gir Statkraft eit betydelig auka rom for lønsame investeringar.

Innanfor dei strategiske hovudretningane som vart vedteke i juni 2010, er det styret si vurdering at Statkraft innanfor ei forretningsmessig ramme kan investere om lag 82 mrd. kroner i perioden fram til 2015. Dette er investeringar som i sin heilskap er knytt til ei auka satsing på miljøvenleg fornybar energi.

For å kunne realisere dette og samstundes sikre selskapet ei akseptabel finansiell stilling, tilrår styret at Statkraft blir tilført 14 mrd. kroner i ny eigenkapital. Det er styret si vurdering at

«styrket egenkapital vil bidra til økt langsiktig verdiskaping til eier og aktiv utvikling av konsernets kjernekompetanse innen vannkraft og markedsoperasjoner både i Norge og internasjonalt» og at «økte investeringer innen miljøvennlig og regulerbart kraftproduksjon vil være et bidrag til å møte verdens klimautfordringer».

Statkraft sin fokuserte strategi

Som styret peikar på i brevet til departementet, vil Statkraft halde fram med å utvikle ein forretningsmodell med vekt på miljøvenleg og fleksibel kraftproduksjon og energihandel. Statkraft vil vidare utvikle verksemda innanfor vindkraft rundt Nordsjøen, og utanfor Europa vil Statkraft utvikle vasskraftproduksjonen i SN Power.

I Noreg har Statkraft høge ambisjonar knytt til innovasjon og nyskaping og vil også støtte opp under ei god utvikling i dei regionale kraftselskapa innanfor miljøvenleg energi. Etter kommersielle vurderingar har Statkraft også bestemt å gå ut av solkraft og å leggje ned ambisjonane om utvikling av nye energiformer som bølge- og tidevasskraft. Statkraft har også lagt til side planar om eventuelle oppkjøp i regionale kraftselskap og om eit eige engasjement innanfor nettverksemd.

Meir konkret medfører den strategien styret har vedteke ei satsing på følgjande hovudområde:

- Europeisk fleksibel kraftproduksjon og markedsoperasjonar

Med utgangspunkt i ei tettare samankopling av kraftmarknadane på kontinentet og

auka satsing på fornybar energi og behov for fleksibel rein energi, ser Statkraft, med sin kompetanse, eit betydelig verdiskapingspotensial innanfor dette området. Konkret vil Statkraft prioritere opprusting og utviding av eksisterande vasskraftverk i Noreg og Norden, optimalisere den nordiske vasskraftporteføljen, bidra til å dekkje industrien sitt behov for stabil og langsiktig kraftforsyning på marknadsmessige vilkår, vidareutvikle marknadsoperasjonane knytt til energi og CO₂, og styrke posisjonen innanfor regulerbar kraft i Nordvest-Europa.

– Internasjonal vasskraft

SN Power er Statkraft sin reiskap for utvikling av nye prosjekt utanfor Europa. SN Power har som mål å investere i, eiga og drive vasskraftprosjekt i nye vekstmarknadar. Dette skjer i hovudsak i partnaraskap med andre aktørar.

Innanfor internasjonal vasskraft vil Statkraft i perioden 2010-2015 prioritere å styrke og vidareutvikle verksemda i SN Power gjennom utbygging og oppkjøp av vasskraft i prioriterte land og auke engasjementet i Tyrkia og Albania.

Satsing i Sørøst-Europa og gjennom SN Power byggjer på forventingar om økonomisk vekst, auka behov for energi og utbygging av ny vasskraft. Gjennom utbygging av forretningsmessige lønnsame prosjekt vil Statkraft bidra til å realisere auka tilgang på energi i desse landa.

I januar 2009 auka Statkraft sin eigarandel frå 50 til 60 pst. i SN Power. Norfund eig resterande 40 pst. Statkraft og Norfund vart i 2009 einige om ein avtale der partane har ulike opsjonar som kan føre til auka eigarskap i SN Power for Statkraft. Samstundes med at Statkraft kjøpte seg opp i SN Power, etablerte SN Power saman med Norfund selskapet SN Power AfriCA for å investere i vasskraft i Afrika og Mellom-Amerika. Regionale norske kraftselskap som BKK (Bergenshalvøens Kommunale Kraftselskap) og Trønder Energi har seinare gått inn som deleigarar i dette selskapet.

– Vindkraft

I Noreg og Sverige har Statkraft ei betydeleg portefølje av vindkraftprosjekt. Dette er prosjekt som gir synergjar mot den øvrige verksemda. I Storbritannia har Statkraft valt å konsolidere aktivitetane innan landbasert vindkraft på grunn av konkurransesituasjonen i landet. For havbasert vindkraft utviklar Statkraft

prosjektet Sheringham Shoal saman med Statoil. Dette prosjektet vil vere ferdig utbygd i løpet av 2012.

Statkraft deltar også i konsortiet Forewind som har fått rett til å utvikle havvindparkar på Doggerbank fram mot konsesjonstildeling. Dette er den største sona som er tildelt i den tredje lisensrunden for utbygging av havvind i Storbritannia. Konsortiet er samansett av Statkraft, Statoil, RWE npower og Scottish and Southern Energy (SSE). Statkraft vil, saman med sine partnarar, fram mot 2015 utvikle prosjekt fram mot konsesjon og vurdere potensialet for investeringar på Doggerbank. Eventuelle konkrete investeringar vil Statkraft derfor ta stilling til seinare. Eventuelle større investeringar på Doggerbank ligg derfor utanfor ramma av Statkraft sin noverande investeringsplan.

Innanfor vindkraft vil Statkraft i perioden 2010-2015 prioritere å styrke sin posisjon innanfor landbasert vindkraft i Noreg og Sverige, og vidareutvikle sin posisjon innanfor havbasert vindkraft i Storbritannia.

– Fjernvarme, småkraft og innovasjon

Statkraft forventar vekst innanfor avfalls- og biobasert fjernvarme i Noreg, medan potensialet i det øvrige Norden i hovudsak er knytt til restrukturering av eksisterande anlegg. Statkraft vil styrke posisjonen som ein av dei to største fjernvarmeaktørane i Noreg. I Sverige er ambisjonen å utvikle eksisterande anlegg, men ikkje å vekse i nye område.

Småkraft AS har fokus på utbygging og drift av småkraftverk i Noreg. Statkraft har 40 pst. direkte eigardel i selskapet. Fram mot 2015 ønskjer Statkraft å vidareutvikle dette selskapet innanfor det potensialet som er for denne typen prosjekt.

Statkraft har i dag betydeleg verksemd knytt til innovasjon/forskning og utvikling (FoU), bl.a. saman med leiande universitetsmiljø i Noreg, Sverige og Danmark. Totale FoU-kostnader for Statkraftkonsernet var om lag 170 mill. kroner i 2009. Som eit resultat av investeringsstrategien, vil innovasjonsprosjekta til Statkraft spissast mot prioriterte kjerneområde. Uviklinga av saltkraft vil fortsette.

– Regionale selskap

Statkraft har offensive mål for utviklinga av miljøvenleg energi og andre kjerneaktivitetar innanfor energiområdet. Statkraft vil støtte opp under industrielle initiativ i dotterselskapa Ska-

gerak Energi og Fjordkraft og i dei tilknytte selskapa BKK, Agder Energi og Istad som støttar desse måla.

Ekstern vurdering

På oppdrag frå departementet har den internasjonale investeringsbanken Nomura vurdert dei forretningsmessige forholda knytt til førespurnaden frå styret i Statkraft om ei styrking av kapitaliseringa av selskapet, målt mot eit alternativ der Statkraft må finansiere sine investeringar mellom anna ved sal av aktiva. Det gir ei ramme for investeringar som ligg 16,5 mrd. kroner lågare enn det styret meiner er det beste alternativet for selskapet.

Hovudkonklusjonane til Nomura er som følger:

- Strategien i dei to alternativa er relativt like med vekst i låg-karbon-produksjon i Nordvest-Europa og utnytting av vasskraftkompetanse internasjonalt.
- Begge alternativa vil inneber langsiktige investeringar, og dersom selskapet når målsettingane sine, bør begge alternativa bidra til auka inntening etter 2015.
- Investeringar og posisjoneringar innanfor internasjonal vasskraft og havvind er forbunde med høgare risiko enn investeringar knytt til kjerneverksemda i Nordvest-Europa. Med basis i Statkraft sin kompetanse frå norsk energinæring, og sine resultat frå den internasjonale verksemda så langt, meiner Nomura at Statkraft har gode føresetnader for å lykkast med satsinga på vasskraft utanfor Nordvest-Europa. Når det gjeld havvind så er dette ei satsing som i større grad er strategisk knytt til kjerneverksemda og som understøttast av Statkraft sin kompetanse og erfaring som prosjektutviklar.
- Styret sin plan med ei styrking av eigenkapitalen vil gi Statkraft ein langt betre strategisk og finansiell fleksibilitet. Dette gir eit større handlingsrom for å realisere planen, sterkare posisjon for å førebu verdiaukande investeringar etter 2015 (til dømes Doggerbank), og mindre press på kredittvurderinga av selskapet.
- Styret sin plan er forventa å gi høgare samla utbytte for planperioden, det vil seie 2010-2015. Ein reknar med at skilnaden bør auke over tid på grunn av lønsam vekst.
- Ei vellykka gjennomføring av styret sin plan, og fortsett fokus på vekst frå 2015 til 2025, er forventa å gi høgare avkastning enn å gjennomføre den planen selskapet inntil no har følgd basert på at selskapet får tilført ny eigenkapital. Pla-

nen som inneber 14 mrd. kroner i auka eigenkapital, vurderast derfor å vere forretningsmessig verdiskapande for staten som eigar.

- Investeringsstrategien inneber større vekst i land med høgare risiko enn dagens kjerneområde. Dette aukar forretningsrisikoen og kan isolert vere negativt for kredittvurderinga av selskapet. Statkraft har ei relativt lågare kredittvurdering enn konkurrentane sine, blant anna pga. høgare gjeldsgrad og høgt utbytenivå. Dersom planane skal gjennomførast, som foreslått av selskapet er det derfor nødvendig at selskapet får tilført den foreslåtte kapitalen eller at utbytenivået reduserast betydeleg.

Nomura peikar vidare i si vurdering på at investeringane styret legg opp til, er på line med andre store kraftselskap i Europa og at Statkraft sidan 2006 har vist ei høgare avkastning på eigenkapitalen enn gjennomsnittet av børsnoterte konkurrentar.

Vurdering

Statkraft er eit av dei viktigaste og mest verdifulle selskapa staten eig. Statkraft forvaltar betydelege norske vasskraftressursar som regjeringa ønskjer skal komme heile samfunnet til gode gjennom avkastinga frå verksemda. Statkraft er vidare ein sentral aktør for utvikling av det norske kompetansemiljøet innanfor energiproduksjon generelt og miljøvenleg energiproduksjon spesielt.

Statkraft har med basis i lang erfaring og kompetanse frå norsk vasskraftproduksjon hatt ei offensiv utvikling dei siste åra og selskapet er i dag den største produsenten av fornybar energi i Europa.

Regjeringa ønskjer å leggje til rette for å utvikle Statkraft som ein motor innanfor fornybar energiproduksjon og å vidareutvikle kompetansen som Statkraft i dag har knytt til miljøvenleg energi. Regjeringa ønskjer å kapitalisere vidare på dei midlane som staten alt har investert i Statkraft, til utviklinga av norsk miljøvenleg energikompetanse. Regjeringa ønskjer vidare å bidra til tilgang på rein fornybar energi i raskt veksande økonomiar gjennom å leggje til rette for at Statkraft har finansielle rammer til å gjere lønsame investeringar gjennom SN Power.

Regjeringa er opptatt av at Statkraft styrker stillinga framover som ein sentral norsk aktør innanfor miljøvenleg fornybar energi. Med grunnlag i dette er det regjeringa si vurdering at Statkraft bør styrke sine posisjonar innanfor vass- og vindkraftproduksjon og i mindre grad bør engasjere seg i gasskraftproduksjon utan renseteknologi

framover. Regjeringa legg i samband med dette til grunn at ei tilføring av ny kapital ikkje nyttast til investeringar i kolkraft eller atomkraft og heller ikkje nyttast til oppkjøp av nye gasskraftverk.

Som det går fram av eigarskapsmeldinga frå 2006, jf. St.meld. nr. 13 (2006-2007), er hovudoppgåva til Statkraft å vere ein effektiv produsent av kraft i Noreg. Regjeringa meiner at dette framleis bør vere hovudoppgåva for verksemda. Av konkurranseomsyn har Statkraft svært begrensa rom for auka engasjement innanfor kraftproduksjon i Noreg. Vekst og utvikling av selskapet må derfor i stor grad skje gjennom auka engasjement internasjonalt. Regjeringa legg her til grunn at ny kapital ikkje skal nyttast til fleire oppkjøp i regionale kraftselskap i Noreg.

Samstundes er regjeringa opptatt av at større satsing utanfor Noreg, må underbyggje Statkraft si verksemd i Noreg. Regjeringa forventar at den kompetansen som selskapet opparbeider gjennom internasjonale engasjement innanfor fornybar energi, til dømes innanfor hav- og landbasert vindkraft, også blir tatt i bruk i Noreg når dette er forretningsmessig lønsamt.

Regjeringa viser til dei kommersielle vurderingane Nomura har gjort på oppdrag frå Nærings- og handelsdepartementet, om at ytterlegare investeringar frå staten i Statkraft vil kunne vere verdi-aukande for staten som eigar. Regjeringa er også opptatt av at Statkraft skal inngå partnerskap for å dele risiko i investeringane utanfor kjerneverksemda i Nordvest-Europa.

Med bakgrunn i vurderingane over gjer regjeringa framlegg om at eigenkapitalen i Statkraft blir styrkt med 14 mrd. kroner. Regjeringa legg til grunn at dagens utbytopolitikk førast vidare.

Regjeringa sitt forslag inneber finansiell tilrettelegging for gjennomføring av selskapet sin strategi gjennom auke av staten sin innskotskapital i Statkraft SF. Auka kapitalinnskot i Statkraft SF til styrking av eigenkapitalen inneber i realiteten at utbytet i 2010 skal førast tilbake til selskapet. For å få fram eit korrekt uttrykk for det oljekorrigererte underskotet før lånetransaksjonar i statsbudsjettet, foreslås derfor det allereie utbetalte utbytet på 4 189 mill. kroner ført tilbake til selskapet ved at løyvinga under kap. 5656 Aksjar i selskap under NHD si forvaltning, post 85 Utbyte, reduserast med 4 189 mill. kroner. I tillegg foreslås 9 811 mill. kroner løyvd på kap. 950 Forvaltning av statleg eigarskap, ny post 95 Kapitalinnskot. Til saman utgjer desse løyvingane 14 mrd. kroner. Løyving til auka innskotskapital inneber ei endring i staten si formueplassering.

Auken av eigenkapitalen i selskapet vil bli vedteke i ekstraordinært føretaksmøte etter at Stortinget har gjort dei nødvendige løyvingvedtaka.

Post 96 Aksjar

Stortinget vedtok 16. juni 2010 ei løyving på 4 400 mill. kroner i samband med ein emisjon i Norsk Hydro ASA, jf. Prop. 131 S og Innst. 370 S (2009-2010) Norsk Hydro ASA – statlig deltakelse i kapitalforhøyelse. Faktisk utbetaling ved emisjonen vart om lag 50 mill. kroner lågare.

På dette grunnlaget gjer Nærings- og handelsdepartementet framlegg om å redusere løyvinga med 49,9 mill. kroner, frå 4 982,7 til 4 932,8 mill. kroner.

Kap. 960 (nytt) Raufoss ASA

Post 71 Refusjon for miljøtiltak

Ved behandlinga av St.prp. nr. 40 og Innst. S. nr. 147 (2003–2004) Statlig miljøansvar på Raufoss, fatta Stortinget følgjande vedtak:

«Stortinget samtykker i at staten ved Nærings- og handelsdepartementet kan utstede garantier for miljø- og forurensningsansvar i Mjøsa og på Raufossområdet som følger av offentligrettslig miljøpålegg oppad begrenset til 50 mill. kroner.»

Bakgrunnen for vedtaket var at vurderingar av juridiske problemstillingar viste at staten kunne haldast ansvarleg for eventuelle miljøplikter knytt til historisk relatert forureining på Raufoss-området, samt deponering av ammunisjon m.v. i Mjøsa. Den einstemmige tilslutninga frå Stortinget vart eit vesentleg bidrag til å få selt og vidareført verksemdene på Raufoss.

Stortinget vedtok 15. juni 2007 å utvide den statlege garantiramma for miljø- og forureiningsansvaret etter verksemda til Raufoss ASA frå 50 til 90 mill. kroner, jf. St.prp. nr. 69 og Innst. S. nr. 230 (2006-2007).

Eit eige prosjekt i regi av Raufoss Industripark gjennomfører miljøtiltaka, med grunnlag i pålegg frå Klima- og forureiningsdirektoratet (Klif) til Raufoss Næringspark ANS.

På bakgrunn av tiltaka som er gjennomført, har ein registrert vesentleg betring av miljøkvaliteten i Raufoss Industripark. Totalt er meir enn 600 tonn tungmetall fjerna frå jordsmonnet og frakta til forsvarleg sluttdeponering i godkjent deponi. Overvakinga viser at vasskvaliteten i

Hunnselva er betra dei siste åra, og verknaden frå industriparken er betydeleg redusert.

Nærings- og handelsdepartementet har sidan 2004 refundert kostnader knytt til pålagte miljøtiltak på Raufoss. Refusjonane utgjorde i alt 72,4 mill. kroner pr. 31. desember 2009. Utbetalingane fram til no i 2010 utgjer 9,2 mill. kroner. Ifølgje Raufoss Næringspark ANS vil det bli oversendt ytterlegare refusjonskrav på om lag 7 mill. kroner i 4. kvartal. I tillegg kjem påløpne, ikkje utbetalte kostnader på til saman ca 2,5 mill. kroner i 2010. Det inneber at dei økonomiske forpliktingane ved utgangen av 2010 vil vere noko høgare enn gjeldande garantiramme på 90 mill. kroner.

Oppryddinga i samsvar med gitte pålegg frå Klif ventast slutført i 2010. Klif har signalisert at sjølv om tiltaka er gjennomført i samsvar med tidlegare gitte pålegg, vil det vere behov for vidare oppfølging. Med bakgrunn i brev frå Klif av 20. august 2010 vil truleg Klif komme med pålegg om vidareføring av tiltak og overvaking av grunnvatn og overvatn knytt til historisk forureining på Raufoss Industripark. Ifølgje statens miljørådgivar vil eit nytt pålegg frå Klif til Raufoss Næringspark ANS føre til kostnader på om lag 34 mill. kroner fram til 2014. For å kunne oppfylle gjeldande og eit framtidig pålegg frå Klif foreslås ramma for det statlege garantiansvaret utvida til 124 mill. kroner i statsbudsjettet for 2010.

Garantien skal berre dekkje kostnader knytt til historisk forureining og ikkje forureining frå den aktive drifta på Raufoss. Vurderinga av kva som er historisk forureining skjer på ein kvalitetsmessig måte etterkvart som ny forureining blir oppdaga. I alle tiltaksplanane er det vurdert om forureininga er historisk eller ikkje, og i dei tilfella der det har vist seg at forureininga ikkje har vore historisk, har verksemdene sjølv stått for nødvendige tiltak.

På denne bakgrunnen gjer Nærings- og handelsdepartementet framlegg om å løyve 16,2 mill. kroner til refusjonar for 2010. Vidare gjer departementet framlegg om å utvide den statlege garanti-ramma for miljø- og forureiningsansvar på Raufoss frå 90 til 124 mill. kroner, jf. Forslag til vedtak II.

Kap. 2421 Innovasjon Norge

Post 50 Innovasjon, prosjekt – fond

I samband med Revidert Nasjonalbudsjett for 2010 blei det løyvd 67 mill. kroner til tapsavsetningar i samband med at ramma for innovasjonslån blei auka med 200 mill. kroner øyremerkert for maritime næringar. Sjølv om Innovasjon Norge har

promotert ordninga gjennom året, ligg det ikkje an til at låneramma vil bli nytta fullt ut. Det same gjeld dermed òg det tilhøyrande tapsfondet til innovasjonslån øyremerkert for maritim sektor. Den øyremerkte delen av låneramma kan dermed reduserast med 50 mill. kroner og tapsløyvinga med 16 mill. kroner som følgje av dette.

På dette grunnlaget gjer Nærings- og handelsdepartementet framlegg om å redusere løyvinga under posten med 16 mill. kroner, frå 460 til 444 mill. kroner.

Endring i forholdet mellom rammene for landsdekkande innovasjonslån og garantiar

Gjennom Regjeringa sine tiltakspakker og Revidert Nasjonalbudsjett for 2009 er rammene til Innovasjon Norge auka vesentleg. Også i 2010 var selskapet sine rammer høgare enn i saldert budsjett for 2009. Situasjonen i kapitalmarknaden har i løpet av året betra seg ytterlegare.

Nærings- og handelsdepartementet vurderer det no slik at det vil vere meir formålstenleg å endre forholdet mellom ramma for landsdekkande innovasjonslån og ramma for garantiar for lån til realinvesteringar og driftskapital.

På dette grunnlaget gjer Nærings- og handelsdepartementet framlegg om å auke ramma for landsdekkande garantiar med 30 mill. kroner, jf. Forslag til vedtak III, mot ein tilsvarande reduksjon i ramma for innovasjonslån. Forslaga ovanfor inneber dermed å redusere ramma for innovasjonslån med til saman 80 mill. kroner, til 620 mill. kroner, jf. Forslag til vedtak IV.

Post 70 Bedriftsutvikling og administrasjon

Regjeringa har i statsbudsjettet for 2011 gjort framlegg om å redusere i løyvingane til Innovasjon Norge. Reelt sett er løyvingane redusert med 30,3 mill. kroner, men det er samstundes gjort ein del omprioriteringar innanfor løyvingane på Nærings- og handelsdepartementet sitt budsjett. Dette fører til eit lågare bemanningsbehov i Innovasjon Norge. Det er styret i Innovasjon Norge som fattar vedtak om korleis bemanningssituasjonen skal handterast. Nærings- og handelsdepartementet ventar, på bakgrunn av informasjon frå Innovasjon Norge, at selskapet har behov for reduksjon i bemanninga ut over reduksjonar ved naturleg avgang og avslutting av kortvarige engasjement som blei oppretta for å handtere finanskrisetiltaka i 2009 og 2010. Det er viktig at Innovasjon Norge får midlar til å kunne gjennomføre ein forsvarleg nedbemanningssituasjon. Dette

vil sikre grunnlaget for ei god gjennomføring av pålagte oppdrag i 2011. Innovasjon Norge følgjer alminnelege rekneskapsprinsipp. Dette betyr at ein må sette av midlar til å dekkje omkostnadene til året vedtaket om nedbemanning blir gjort, dvs. i inneverande år.

På dette grunnlaget gjer Nærings- og handelsdepartementet framlegg om å auke løyvinga med 20 mill. kroner i 2010, frå 435,3 til 455,3 mill. kroner. Midla skal dekkje kostnader knytt til nedbemanning i selskapet.

Post 90 Lån frå statskassa til utlånsverksemd, overslagsløyving

Innovasjon Norge kan ta opp innlån i statskassa til valfri løpetid og med ein rentesats som svarar til renta på statspapir med same løpetid. Selskapet betaler òg ein låne- og garantiprovisjon på 1 pst. p.a. Innovasjon Norge refinansierer utlånsporteføljen ved å ta opp kort- og langsiktige lån i statskassa med tilbakebetalingstid på frå to månader til fleire år avhengig av rentebindingstid på utlåna. Innlån og avdrag bruttoførast, dvs. at beløpa utgifts- og inntektsførast (akkumulert) kvar gong Innovasjon Norge tek opp eller tilbakebetaler eit lån i statskassa. Løyvinga vil variere meir som følgje av kor hyppig ein refinansierer innlåna enn som følgje av endringar i utlånsvolumet. Avdrag på innlåna blir inntektsført under kap. 5325. Løyvingsendringane på statsbudsjettet 2010 er basert på realiserte innlån og avdrag og prognosar på innlån og avdrag for resten av året.

Innlån og avdrag har blitt auka i 2010 fordi Innovasjon Norge har tatt opp meir kortsiktige lån enn det som låg til grunn ved salderinga av budsjettet for 2010. Dette inneber òg at avdraga blir auka, jf. omtale under kap. 5325, post 90.

På dette grunnlaget gjer Nærings- og handelsdepartementet framlegg om å auke løyvinga med 1,05 mrd. kroner, frå 45,9 til 46,95 mrd. kroner.

Kap. 2426 SIVA SF

Post 90 Lån, overslagsløyving

SIVA SF kan ta opp innlån i statskassa til valfri løpetid og med ein rentesats som svarar til renta på statspapir med same løpetid. Selskapet betaler òg ein låne- og garantiprovisjon på 1 pst. p.a. Avdrag på innlåna blir inntektsført under kap. 5326. Ved saldering av budsjettet for 2010 la ein til grunn at SIVA ville refinansiere eit lån som hadde

forfall i september. På grunn av god likviditet fann SIVA at det ikkje var nødvendig å ta opp nytt lån.

På dette grunnlaget gjer Nærings- og handelsdepartementet framlegg om å redusere løyvinga med 60 mill. kroner, frå 100 til 40 mill. kroner.

Kap. 3901 Styret for det industrielle rettsvern

Post 01 Patentavgifter

Patentavgiftene ved utgongen av 3. kvartal er lågare enn anslått. Patentstyret antar derfor at inntektskravet for 2010 ikkje vil bli nådd. Årsaka til mindreinntekta er at Patentstyret ikkje har motteke så mange meddelte patentar som det var lagt til grunn i saldert budsjett, og at det blir mindre inntekter frå årsavgifter enn tidlegare berekna.

På dette grunnlaget gjer Nærings- og handelsdepartementet framlegg om å redusere inntektsløyvinga med 11,85 mill. kroner, frå 118 til 106,15 mill. kroner.

Post 02 Varemerkeavgifter og post 03 Designavgifter

På grunn av større søknadsinngang legg Patentstyret til grunn at det blir ein vesentleg auke i inntektene frå varemerkeavgifter og ein mindre auke i inntektene frå designavgifter.

På dette grunnlaget gjer Nærings- og handelsdepartementet framlegg om å auke inntektsløyvinga under post 02 med 6,5 mill. kroner, frå 55 til 61,5 mill. kroner, og å auke inntektsløyvinga under post 03 med 0,3 mill. kroner, frå 3,7 til 4 mill. kroner.

Post 05 Inntekt av informasjonstenester

Patentstyret reknar med mindreinntekt frå informasjonstenester. Dette skuldast at det blir færre forundersøkingar enn planlagt og mindre delta-king på kurs.

På dette grunnlaget gjer Nærings- og handelsdepartementet framlegg om å redusere inntektsløyvinga med 2 mill. kroner, frå 8,7 til 6,7 mill. kroner.

Post 06 Diverse inntekter

Nærings- og handelsdepartementet gjer framlegg om å auke inntektsløyvinga med 0,3 mill. kroner, frå 0,1 til 0,4 mill. kroner.

Post 07 Avgifter knytt til NPI

Innbetalte NPI-avgifter ved utgangen av 3. kvartal gjer grunnlag for å redusere inntektsanslaget på budsjettposten med 0,85 mill. kroner.

På dette grunnlaget gjer Nærings- og handelsdepartementet framlegg om å redusere inntektsløyvinga med 0,85 mill. kroner, frå 2,2 til 1,35 mill. kroner.

Kap. 3902 Justervesenet

Post 01 Gebyrinntekter og post 03 Inntekter frå sal av tenester

I saldert budsjett er det anslått inntekter på 42,6 mill. kroner under post 01 og 13,94 mill. kroner under post 03. Til saman utgjer dette 56,54 mill. kroner. Det er behov for ei omfordeling slik at post 01 vert auka til 45,05 mill. kroner og post 03 redusert til 11,49 mill. kroner.

På dette grunnlaget gjer Nærings- og handelsdepartementet framlegg om å auke inntektsløyvinga under post 01 med 2,45 mill. kroner, frå 42,6 til 45,05 mill. kroner, og å redusere inntektsløyvinga under post 03 med 2,45 mill. kroner, frå 13,94 til 11,49 mill. kroner.

Kap. 3907 Sjøfartsdirektoratet

Post 02 Maritime personellsertifikat

Løyvinga omfattar gebyr for utsteding av maritime personellsertifikat. På grunnlag av innbetalte gebyr hittil i år og prognose for innbetaling i resten av året, reknar Sjøfartsdirektoratet med at det blir svikt i gebyrinntekta under posten med om lag 4 mill. kroner. Årsaka til dette er at vesentleg færre har teke obligatorisk båtførarløyve i 2010 enn det som vart lagt til grunn i saldert budsjett.

På dette grunnlaget gjer Nærings- og handelsdepartementet framlegg om å redusere inntektsløyvinga med 4 mill. kroner, frå 15 til 11 mill. kroner.

Post 06 Overtredelsesgebyr

På bakgrunn av føresegn i skipssikkerheitslova, jf. Ot.prp. nr. 87 (2005-2006), har Sjøfartsdirektoratet innført gebyr for brot på lova. Føremålet med gebyret er å sikre effektiv handheving av lova. Intensjonen er at påtalemakta ikkje skal tyngast med saker som raskt kan avgjerast av forvaltninga, og som tilsynsstyremakta oppdagar i samband med sin kontroll, til dømes manglande oppfylling

av pålegg, krav i forskrifta eller manglande sertifikat. Nærings- og handelsdepartementet legg til grunn eit gjennomsnittleg gebyr på kr 100 000 for føretakssaker og kr 25 000 for personlege sertifikat, og at det samla vil bli innbetalt om lag 14 mill. kroner i gebyr i 2010. Årsaka til reduksjonen i gebyrinntekta er at Sjøfartsdirektoratet har behandla færre saker enn det som var lagt til grunn i saldert budsjett.

På dette grunnlaget gjer Nærings- og handelsdepartementet framlegg om å redusere inntektsløyvinga med 8,5 mill. kroner, frå 22,5 til 14 mill. kroner.

Kap. 3950 Forvaltning av statleg eigarskap

Post 96 Sal av aksjar

I statsbudsjettet er det løyvd 10 mill. kroner frå mogelege statlege aksjesal i 2010. Inntektsbeløp for dei einskilde aksjesala er føresett løyvd i løpet av budsjettåret når transaksjonane er avklara eller gjennomførte, anten i eigne proposisjonar eller i dei faste endringsproposisjonane i vår- og haustsesjonen. Nærings- og handelsdepartementet legg til grunn at det ikkje blir slike sal i inneverande år.

På dette grunnlaget gjer Nærings- og handelsdepartementet framlegg om å redusere inntektsløyvinga med 10 mill. kroner, frå 10 mill. kroner til 0.

Kap. 5325 Innovasjon Norge

Post 90 Avdrag på utestående fordringar

Posten omfattar avdrag på lån til Innovasjon Norge frå statskassa. Vi viser til omtale av opplegget for innlån under kap. 2421, post 90 ovanfor. Som følgje av opptak av meir kortsiktige lån enn lagt til grunn i saldert budsjett, er det behov for å auke løyvinga.

På dette grunnlaget gjer Nærings- og handelsdepartementet framlegg om å auke inntektsløyvinga med 2,3 mrd. kroner, frå 43,8 til 46,1 mrd. kroner.

Post 91 (ny) Tilbakeført kapital, såkornfond

Bubehandlinga etter konkursen i Såkorninvest Innlandet AS er avslutta. Innovasjon Norge sitt lån til selskapet var opphavelig på 30 mill. kroner, med eit tilhøyrande tapsfond på 7,5 mill. kroner. Tapsfondet blei fullt utnytta. Etter konkursbehandlinga fekk Innovasjon Norge ein dividende på 2,4 mill. kroner. I samband med Revidert Nasjonalbudsjett

2010 blei det løyvd 23,8 mill. kroner (under kap. 2421, post 51) til dekking av tap knytt til konkursen.

På dette grunnlaget gjer Nærings- og handelsdepartementet framlegg om ei inntektsløyving på 30 mill. kroner knytt til tilbakebetaling av lån til Såkorninvest Innlandet AS.

Som det går fram av Prop. 1 S (2010-2011) for Nærings- og handelsdepartementet, skal lån til såkornselskapa bli aktivert i den statlege kapitalrekneskapa under kontogruppe 63 Utlån og utestående fordringar. Ved tilbakeføring av kapital frå eit såkornfond til kap. 5325, post 91 skal kontogruppe 63 reduserast tilsvarande.

Kap. 5326 SIVA SF

Post 90 Avdrag på utestående fordringar

Posten omfattar avdrag på lån til SIVA frå statskassa. Ein viser til omtale av opplegget for innlån under kap. 2426, post 90 ovanfor. SIVA har innbetalt to lån på til saman 80 mill. kroner i 2010.

På dette grunnlaget gjer Nærings- og handelsdepartementet framlegg om å auke inntektsløyvinga med 40 mill. kroner, frå 40 til 80 mill. kroner.

Kap. 5460 Garanti-instituttet for eksportkreditt

Post 91 Avdrag på lån til byggelånsgarantiordninga

GIEK tok i mai 2009 opp eit lån i statskassa på 104 mill. kroner for å dekkje erstatningsansvar under garantiordninga for byggelån til skipsbyggingsindustrien. Lånet skulle betalast tilbake fortløpande når fordringane som følgje av erstatning heilt eller delvis er dekt inn, eller eventuelt gjennom premieinntektene dersom det er likviditet under garantiordninga. Lånet blei fullt ut gjort opp i mai 2010.

Nærings- og handelsdepartementet gjer på dette grunnlaget framlegg om å auke inntektsløyvinga med 103,9 mill. kroner, frå 0,1 til 104 mill. kroner. Renter inntektsførast under kap. 5614, post 80.

Kap. 5613 Renter frå SIVA SF

Post 80 Renter

Det visest til omtale av opplegget for innlån til SIVA SF under kap. 2426, post 90 ovanfor. Som følgje av rentestrukturen på dei statspapira som låna

til SIVA er knytt opp til, er det grunnlag for å auke renteinntektsløyvinga med 6,8 mill. kroner.

På dette grunnlaget gjer Nærings- og handelsdepartementet framlegg om å auke inntektsløyvinga med 6,8 mill. kroner, frå 30,3 til 37,1 mill. kroner.

Kap. 5614 Renter frå Garanti-instituttet for eksportkreditt

Post 80 Renter

Det visest til omtale under kap. 5460. Garanti-instituttet for eksportkreditt (GIEK) tok i mai opp eit lån i statskassa på 104 mill. kroner for å dekke eit erstatningsansvar under garantiordninga for byggelån til skipsbyggingsindustrien. GIEK skal betale renter av den til ei kvar tid utestående delen av lånet. Renta på lånet er sett til renta for forvaltingsversemdene sitt mellomvere med statskassa som Finansdepartementet kunngjer i rundskriv kvart halvår. Lånet blei gjort opp i mai 2010. Dette inneber at renteinnbetalingane blir vesentleg mindre enn lagt til grunn i saldert budsjett.

Nærings- og handelsdepartementet gjer på dette grunnlaget framlegg om å redusere inntektsløyvinga med kr 2 058 000, frå kr 2 800 000 til kr 742 000.

Kap. 5625 Renter og utbyte frå Innovasjon Norge

Post 80 Renter på lån frå statskassa

Innovasjon Norge kan ta opp innlån til låneordningane sine til valfri løpetid og ein rentesats som svarar til renta på statspapir med same løpetid. Vi viser til omtale av opplegget for innlån under kap. 2421, post 90 ovanfor. Som følgje av faktiske renteinnbetalingar og prognoser for resten av året er det grunnlag for å justere renteinntektsløyvinga ned på grunn av lågare rentesatsar enn lagt til grunn for løyvinga ved saldering av budsjettet for 2010.

På dette grunnlaget gjer Nærings- og handelsdepartementet framlegg om å redusere inntektsløyvinga med 95 mill. kroner, frå 400 til 305 mill. kroner.

Post 83 (ny) Tilbakeføring av renter frå såkornkapitalfond

Bubehandlinga etter konkursen i Såkorninvest Innlandet AS er avslutta. Innovasjon Norge sitt lån til selskapet var opphaveleg 30 mill. kroner, med

eit tilhøyrande tapsfond på 7,5 mill. kroner. Tapsfondet blei fullt utnytta. Etter konkursbehandlninga fekk Innovasjon Norge ein dividende på 2,4 mill. kroner. Akkumulerte renter er på 3,7 mill. kroner. I tillegg til dette kjem det eit tap på om lag kr 447 000, som er knytt til tap på renter på den delen av hovudstolen som blir dekt av tapsfondet på 7,5 mill. kroner. Dette tapet blir dekt over den føreliggande utgiftsløyvinga under kap. 2421, post 51. I samband med Revidert Nasjonalbudsjett for 2010 blei det løyvd 23,8 mill. kroner til dekking av tap knytt til konkursen.

På denne bakgrunnen gjer Nærings- og handelsdepartementet framlegg om at samla renter på om lag 4,1 mill. kroner blir ført som inntektsløyving i 2010 under ny post 83.

Post 87 (ny) Utbyte frå Investinor AS

I 2009 fekk Investinor AS eit resultat etter skatt på 51 mill. kroner, som følgje av finansielle plasseringar. Ifølgje retningslinene for utøving av eigarskapet i selskapet skal utbytet skal fastsettast til 75 pst. av årsresultatet, avgrensa oppover til innskotskapitalen multiplisert med rentesatsen på staten sin kapital. Rentesatsen for staten sin kapital i investeringsselskapet skal vere lik den gjennomsnittlege renta på femårs statsobligasjonslån. Utbyte i 2009, til utbetaling i 2010, er ut frå dette 38,3 mill. kroner.

På dette grunnlaget gjer Nærings- og handelsdepartementet framlegg om ei inntektsløyving på 38,3 mill. kroner under ny post 87.

Kap. 5656 Aksjar i selskap under NHD si forvaltning

Post 85 Utbyte

Regjeringa gjer framlegg om auking av eigenkapitalen i Statkraft SF med 14 mrd. kroner, jf. nærare

omtale under kap. 950, post 95. 4 189 mill. kroner av auken dekkast ved at selskapet får ført tilbake utbetalt utbyte i 2010.

På dette grunnlaget gjer Nærings- og handelsdepartementet framlegg om å redusere løyvinga under kap. 5656, post 85 med 4 189 mill. kroner, frå 9 050 til 4 861 mill. kroner.

Orienteringssak

Kap. 5460 Garanti-instituttet for eksportkreditt

Resultatet for Alminnelig garantiordning for 2010 vil venteleg ligge vesentleg under anslaget i budsjettet for 2010. Årsaka er at fleire nye garantiar er blitt innvilga enn det som elles har vore normalt. Avsettingane blir då høge, og fordi betalingane frå eksportørane ikkje blir bokført med ein gong, men blir ført over heile løpetida til garantipolisen, blir resultatet negativt. I Prop. 1 S (2009-2010) var prognosen eit positivt resultat på 10 mill. kroner. Resultatet i første halvår viser som følgje av dei mange garantiane eit underskot på 406 mill. kroner. GIEK går no gjennom rekneskapsprinsippa sine for å vurdere om avsettingar og inntekter bør bli bokført på ein anna måte.

Nærings- og handelsdepartementet

t i l r å r :

At Dykkar Majestet godkjenner og skriv under eit framlagt forslag til proposisjon til Stortinget om endringar i statsbudsjettet for 2010 under Nærings- og handelsdepartementet.

Vi HARALD, Noregs Konge,

s t a d f e s t e r :

Stortinget blir bedt om å gjere vedtak om endringar i statsbudsjettet for 2010 under Nærings- og handelsdepartementet i samsvar med eit vedlagt forslag.

Forslag

til vedtak om endringer i statsbudsjettet for 2010 under Nærings- og handelsdepartementet

I

I statsbudsjettet for 2010 blir det gjort følgende endringer:

Utgifter:

Kap.	Post	Formål	Kroner
900		Nærings- og handelsdepartementet	
	01	Driftsutgifter, blir auka med frå kr 174 467 000 til kr 174 542 000	75 000
909		Tiltak for sysselsetting av sjøfolk	
	73	Tilskot til sysselsetting av sjøfolk, <i>overslagsløyving</i> , blir redusert med frå kr 1 700 000 000 til kr 1 550 000 000	150 000 000
922		Romverksemd	
	70	Kontingent i European Space Agency (ESA), blir redusert med frå kr 130 200 000 til kr 122 300 000	7 900 000
	71	Internasjonal romverksemd, blir redusert med frå kr 404 200 000 til kr 382 200 000	22 000 000
	73	Galileo, blir auka med frå kr 119 900 000 til kr 126 400 000	6 500 000
924		Internasjonalt samarbeid og utviklingsprogram	
	70	Tilskot, <i>kan overførast</i> , blir redusert med frå kr 56 000 000 til kr 44 000 000	12 000 000
950		Forvaltning av statleg eigarskap	
	21	Spesielle driftsutgifter, blir auka med frå kr 10 700 000 til kr 24 900 000	14 200 000
	95 (ny)	Kapitalinnskot, blir løyvd med	9 811 000 000
	96	Aksjar, blir redusert med frå kr 4 982 700 000 til kr 4 932 800 000	49 900 000
960 (nytt)		Raufoss ASA	
	71	Refusjon for miljøtiltak, blir løyvd med	16 200 000

Kap.	Post	Formål	Kroner
2421		Innovasjon Norge	
	50	Innovasjon – prosjekter, fond, blir redusert med frå kr 460 000 000 til kr 444 000 000	16 000 000
	70	Bedriftsutvikling og administrasjon, blir auka med frå kr 435 300 000 til kr 455 300 000	20 000 000
	90	Lån frå statskassa til utlånsverksemd, <i>overslagsløyving</i> , blir auka med . . frå kr 45 900 000 000 til kr 46 950 000 000	1 050 000 000
2426		SIVA SF	
	90	Lån, <i>overslagsløyving</i> , blir redusert med frå kr 100 000 000 til kr 40 000 000	60 000 000

Inntekter:

Kap.	Post	Formål	Kroner
3901		Styret for det industrielle rettsvern	
	01	Patentavgifter, blir redusert med frå kr 118 000 000 til kr 106 150 000	11 850 000
	02	Varemerkeavgifter, blir auka med. frå kr 55 000 000 til kr 61 500 000	6 500 000
	03	Designavgifter, blir auka med frå kr 3 700 000 til kr 4 000 000	300 000
	05	Inntekter av informasjonstenester, blir redusert med frå kr 8 700 000 til kr 6 700 000	2 000 000
	06	Diverse inntekter, blir auka med. frå kr 100 000 til kr 400 000	300 000
	07	Avgifter knytt til NPI, blir redusert med frå kr 2 200 000 til kr 1 350 000	850 000
3902		Justervesenet	
	01	Gebyrinntekter, blir auka med frå kr 42 600 000 til kr 45 050 000	2 450 000
	03	Inntekter frå sal av tenester, blir redusert med. frå kr 13 940 000 til kr 11 490 000	2 450 000

Kap.	Post	Formål	Kroner
3907		Sjøfartsdirektoratet	
	02	Maritime personellsertifikat, blir redusert med frå kr 15 000 000 til kr 11 000 000	4 000 000
	06	Overtredelsesgebyr, blir redusert med frå kr 22 500 000 til kr 14 000 000	8 500 000
3950		Forvaltning av statleg eigarskap	
	96	Sal av aksjar, blir redusert med frå kr 10 000 000 til 0	10 000 000
5325		Innovasjon Norge	
	90	Avdrag på uteståande fordringar, blir auka med frå kr 43 800 000 000 til kr 46 100 000 000	2 300 000 000
	91 (ny)	Tilbakeført kapital, såkornfond, blir løyvd med	30 000 000
5326		SIVA SF	
	90	Avdrag på uteståande fordringar, blir auka med frå kr 40 000 000 til kr 80 000 000	40 000 000
5460		Garanti-instituttet for eksportkreditt	
	91	Avdrag på lån til byggelånsgarantiordninga, blir auka med frå kr 100 000 til kr 104 000 000	103 900 000
5613		Renter frå SIVA SF	
	80	Renter, blir auka med frå kr 30 300 000 til kr 37 100 000	6 800 000
5614		Renter frå Garanti-instituttet for eksportkreditt	
	80	Renter, blir redusert med frå kr 2 800 000 til kr 742 000	2 058 000
5625		Renter og utbyte frå Innovasjon Norge	
	80	Renter på lån frå statskassa, blir redusert med frå kr 400 000 000 til kr 305 000 000	95 000 000
	83 (ny)	Tilbakeføring av renter frå såkornkapitalfond, blir løyvd med	4 100 000
	87 (ny)	Utbyte frå Investinor AS, blir løyvd med	38 300 000
5656		Aksjar i selskap under NHD si forvaltning	
	85	Utbyte, blir redusert med frå kr 9 050 000 000 til kr 4 861 000 000	4 189 000 000

II

Utviding av garantifullmakt

Stortinget samtykker i at Nærings- og handelsdepartementet i 2010 kan utgiftsføre utbetalinger knytt til utførte pålagte miljøtiltak etter verksemda i Raufoss ASA utan løyving under kap. 960 Raufoss ASA, post 71 Refusjon for miljøtiltak, innanfor gitt garantiramme på 124 mill. kroner.

III

Garantifullmakt

Stortinget samtykker i at Nærings- og handelsdepartementet i 2010 kan gi Innovasjon Norge full-

makt til å gi tilsegn om nye garantiar for inntil 70 mill. kroner, men slik at totalramma for nytt og gammalt ansvar ikkje overstig 370 mill. kroner.

IV

Lånefullmakt

Stortinget samtykker i at Nærings- og handelsdepartementet i 2010 kan gi Innovasjon Norge fullmakt til å gi tilsegn om nye landsdekkande innovasjonslån innanfor ei ramme på 620 mill. kroner.



